

ಪೌಲನು ಎಫೆಸದವರಿಗೆ ಬರೆದ ಪತ್ರಿಕೆ ಪೌಲಾನಿ ಎಫೆಸಾತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ ವಳಕ್

ಎಫೆಸಾತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ ಕ್ರಿಸ್ತ ಜಲಾಮ್‌ಲ್ಯಾ ನಂತರ್
ಲ ಕರುನ್ 60 ವರ್ಸಾತ್ ಲಿವ್‌ಲ್ಯಾ ಕೊಲೊಸ್ಸೆತ್‌ಲ್ಯಾನಾ ಲಿವ್‌ಲ್ಯಾಲ
ಪತ್ರ ಹ್ಯಾಸ್ ಯಳಾತ್ ಲಿವ್‌ಲ್ಯಾ ಮಂಥ್ಯಾತ್. ಲಿವ್‌ತ್ಯಾಲಾ ಆಪ್ತುಸ್
ಅಪೊಸ್ತಲ್ ಪೌಲ್ ಮನ್ವುನ್ ಗೆತೊ 1:1 ಕೊಲೊಸ್ಸೆತ್ ಆಸ್‌ಲ್ಯಾಚೆಗತ್
ಸ್ವತಾಚೆ ನಮಸ್ಕಾರ್ ಎಫೆಸಾತ್‌ಲ್ಯಾನಾ ಲಿವ್‌ಲ್ಯಾಲ್ಯಾ ಪತ್‌ರ್‌ಲ್ಯಾತ್
ದಿಸುನ್ ಆಲ ದ್ಯಾನ್ ಕರ್ತಾಲ ಹ್ಯ ಪತ್ರ ಪೌಲಾನಿಸ್ ಲಿವ್‌ಲ್ಯಾ
ಮಂಥ್ಯಾತ್. ಹ್ಯಾ ಕಾರ್ನಾಣಿ ಹ್ಯ ಪತ್ರ ತ್ಯಾ ಪ್ರಾಂತ್ಯಾತ್ ಖುಬ್ ಸಬೆನಾ
ಪಗಳ. ಪೌಲ್ ಹ್ಯ ಪತ್ರ ಲಿವ್ತಾನಾ ಆಪ್ತು ತುರುಂಗಾತ್ ಹಾ ಮನ್ವುನ್
ಸಾಂಗ್ಲೊ 3:14:16:20 ಪೌಲಾನಿ ಹ್ಯ ಪತ್ರ ಎಫೆಸಾತ್‌ಲ್ಯಾ ಸಬೆನಾ
ಬೆರಾಯಾ ಜಾತ್ಯಾಲ್ಯಾ ತುಖಿಕಾಪ ದಿವುನ್ ಲಾವುನ್ ದಿಲ 6:21-22

ಎಫೆಸಾ ಪ್ಯಾಟ್ ಯೆಕ್ ಮುಟಿ ಪ್ಯಾಟ್ ವ್ಹವುನ್ ರೊಮ್
ಸಾಮ್ರಾಜಾಚಾ ಆಶಾಮೈನರ್ ಪ್ರಾಂತ್ಯಾಚಿ ರಾಜ್‌ದಾನಿ ಜಾಲ್ಲಿ. ಎಫೆಸಾ
ಪ್ಯಾಟ್ ಗ್ರೀಕ್ ದೇವತೆ ಜಾಲ್ಯಾಲಿ ಆರ್ತೆಮಿಚಾ ದೇವ್ತಾನಿ ಪ್ರಸಿದ್ಧ ಜಾಲ್ಲಿ
ಅಪೊಸ್ತಲ್ 19:23-31 ಎಫೆಸಾ ಪೆರಕ್ಲಿ ಸಭಾ ಸುರ್ವತಾತ್ ಬಳಾನಿ
ರಾಹುನ್ ನಂತರ್ ಸರ್ತ್ಯಾಲಾ ಜಾಖಾಚಾ ಲೆಖ್ಯಾತ್ ಆಲ್ತಿ ದರ್ಶಾನ್
2:1-7

ಪೌಲ್ ಅರ್ಧ್ಯಾನ್ ಅರ್ಧ್ಯಾ ಪತ್‌ರ್‌ಲ್ಯಾತ್ ದೇವಾನಿ ಆಪ್‌ಲ್ಯಾ
ಲೊಕಾನಾ ಕಸಿ ನಿವಡ್ಲಿತ ಆನಿ ಯೇಸು ಕ್ರಿಸ್ತಾಸ್ ಲಾಗುನ್ ತ್ಯಂಚಾ
ಪಾಪಾತ್ನಿ ಕಸಿ ರ್ಯಾಕ್ಲಿತ ಮನ್ವುನ್ ವಿವರನಾ ಕರ್ತೊ. ತ್ಯೊ ಸಬೆ
ಕ್ರಿಸ್ತಾಚೆ ಶರೀರ್ ಆನಿ ಕ್ರಿಸ್ತ ತ್ಯಾಚಿ ಡುಯಿ ಜಾಲ್ಯಾ ಆನಿ ಕ್ರಿಸ್ತ ಕೊನ್ಯಾವ್ಣಾ
ಧೊಂಡಾ ಜಾಲ್ಯಾಲ್ಯಾ ಬಾಂದ್ವಾಲಾ ಮಿಳಿವ್ಲೊ. ಹ್ಯಾ ಪತ್‌ರ್‌ಲ್ಯಾಚಾ

ದೊನವ್ಯಾ ಅರದ್ಯಾ ಭಾಗಾತ್ ಪೌಲ್ ಕ್ರಿಸ್ತಾಚಾ ಜೀವ್ನಾ ಕಸಾ ಕರಾಚಾ ಮನ್ವುನ್ ಪಾರಕ್ ದೊತೊ.

ಪಿರಿಕೆ

1. ಪೌಲ್ ಆಪ್ಲಿ ವಳಕ್ ಕರ್ತೊ ಆನಿ ಎಫೆಸಾತ್‌ಲ್ಯಾನಾ ನಮಸ್ಕಾರ್ ಸಾಂಗ್ತೊ 1:1-2
2. ನಂತರ್ ತ್ಯೊ ಕ್ರಿಸ್ತಾಪ ಸಬೆನಾ ಆಸ್‌ಲ್ಯಾಲೆ ಸಂಬಂದಾಚೆ ಗುಶ್ಟಿತ್ ವಿವರನ್ ಕರ್ತೊ 1:3—3:21
3. ನಂತರ್ ಪೌಲಾನಿ ಇಸ್ವಾಸಿ ಕಸಿ ಜಿವ್ನಾ ಕರಾಯಾ ವ್ಹಯಿತ ಮನ್ವುನ್ ಲಿವ್ಲೊ 4:1—6:20
4. ಸರ್ತ್ಯಾಲಾ ಪೌಲ್ ಥೊಡ್ಯಾ ಪಾರ್ಕಿ ದೆತೊ 6:21-24

¹ ದೇವಾಚಾ ಮನಾನಿ ಕ್ರಿಸ್ತ ಯೇಸುಚಾ ಯೊಕ್ ಅಪೊಸ್ತಲ್ ಜಾಲ್ಯಾಲಾ ಪೌಲ್ ಎಫೆಸಾತ್ ಆಸ್‌ಲ್ಯಾಲ್ಯಾ ದೇವಾಚಾ ಲೊಕಾನಾ ಕ್ರಿಸ್ತ ಯೇಸುವ ಇಸ್ವಾಸ್ ಥೆವ್‌ಲ್ಯಾಲ್ಯಾನಾ,

² ಆಮ್ಚಾ ಬಾ ದೇವಾಪ್ಲಿ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಪ್ಲಿ ತುಮಾನಾ ಕ್ರಪಾ ಶಾಂತಿ ಗಾವುನಿ.

ಕ್ರಿಸ್ತಾಪ್ಲಾ ಆತ್ಮಿಕ್ ಆಶಿರ್ವಾದ್

³ ಆಮಚಾ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಚಾ ದೇವ್ ಬಾ ಜಾಲ್ಯಾಲ್ಯಾಲಾ ದನ್ಯವಾದ್ ವ್ಹವುನಿ, ತ್ಯನಿ ಸ್ವರ್ಗಾತ್ ಸಗ್ಳಾ ಆತ್ಮಿಕ್ ಆಶಿರ್ವಾದ್ ಆಮಾನಾ ಕ್ರಿಸ್ತಾಪ್ಲಿ ದಿಲ್ಯಾ.

⁴ ದುನ್ಯಾಲುತ್ಪನ್ ವ್ಹಯಾಚೆ ಆಂದಿ ದೇವಾನಿ ಕ್ರಿಸ್ತಾಪ ಆಮಾನಾ ತ್ಯಚಿ ಮೊರ್ನ್ ನಿರ್ಮಳ್ ದೊಶ್ ನಸ್ವಾರ್ ವ್ಹಯಾ ವ್ಹಯಿ ಮನ್ವುನ್ ನಿವಡ್ಲಿತ ಕಾ ಮಂಜೆ ಹಿ ತ್ಯಚಿ ಮಾಯಾ ಜಾಲೆ.

⁵ ದೇವಾನಿ ಆಂದಿಸ್ವಾಪ್ಲಿ ಯೇಸು ಕ್ರಿಸ್ತಾಸ್ ಲಾಗುನ್ ಆಮಾನಾ ಆಪ್ಲಿ ಪೊರ ಕರುನ್ ಗಿಹ್ಯಾಸಾಟಿ ಆಪ್ಲೆ ಪುರೆ ದಯೆನಿ ಮನಾನಿ ಯೇಸು ಕ್ರಿಸ್ತಾಸ್ ಲಾಗುನ್ ಆಮಾನಾ ಆಪ್ಲಿ ಪೊರ ಕರುನ್ ದತ್ತಕ್ ಗಿಹ್ಯಾ ಮಾಯೆನಿ ಆಂದಿಸ್ ತಿರ್ಮಾನ್ ಕೆಲಾ.

6 ಯವಾ ಆಮಿ ದೇವಾಚೆ ಮೈಮೆಚೆ ಕ್ರಪೆಸಾಟಿ ಸ್ತುತಿ ಕರುಯಾ ಕಾ ಮಂಜೆ ತ್ಯನಿ ಆಪಲ್ಯಾ ಮಾಯೆಚಾ ಲೆಕಾಪ್ಪಿ ಆಮಾನಾ ಪುಕಟ್ ವರ್ ದಿಲ್ಯಾ.

7 ಯೇಸು ಕ್ರಿಸ್ತಾನಿ ಆಮ್ಚಿಸಾಟಿ ಪ್ಯಾಡ್‌ಲ್ಯಾಲ್ಯಾ ರಕ್ತಾಸ್ ಲಾಗುನ್ ಆಮಾನಾ ದೇವಾಚೆ ಮೊಟೆ ಕ್ರಪೆಚೆ ಸಾವ್ಕರ್ಕಿಸ್ ಲಾಗುನ್ ಪಾಪ ಮಾಪಿ ಕರಾಚಿ ಸುಟ್ಕುಕ್ ಗಾವ್ಚಿ.

8 ತ್ಯನಿ ಆಮಾನಾ ಆಪಲ್ಯಾ ಸಗಲ್ಯಾ ಗಿನ್ಯಾನ್ ಆನಿ ಬುದ್ಧಿ ಸಂಗ ಪುಸ್ತಳ್ ವತಲ್ಯಾ.

9 ದೇವಾನಿ ಆಪ್ಲು ನಿರ್ದಾರ್ ಕೆಲ್ಯಾಲ ಕೆಲ, ಆನಿ ಕ್ರಿಸ್ತಾಪ್ಪಿ ಆತಾಸ್ ಪುರ್ನ ವ್ಹಯಾಲಾ ನಿರ್ದಾರ್ ಕೆಲ್ಯಾಲೆ ಆಪ್ಲೆ ಗುಟಚಿ ಯವಜ್ಞಾ ಆಮಾನಾ ಸಾಂಗ್ಲಿ.

10 ಹಿ ಯವಜ್ಞಾ ದೇವಾನಿ ಶಾರ್ಕ್ಯಾ ಯಳಾತ್ ಪುರ್ನ ಕರ್ನಾರ್ ಸ್ವರ್ಗಾತ್ ಆನಿ ದರ್ಥಿವ ಆಸ್‌ಲ್ಯಾಲಿ ಸಗ್ಳಿ ಉತ್ಪತ್ತಿ ಕ್ರಿಸ್ತಾಲಾ ಡುಯಿ ಕರುನ್ ಯೇಕ್ ಕರ್ನಾರ್.

11 ಆನಿ ಆಪಲ್ಯಾ ಮನಾತಲ್ಯಾ ಉದೆಸಾ ಶಾರ್ಕ್ ಕಾಮ ಚಾಲಿವ್ನಾರಾ ಆಪ್ಲೆ ಯವಜ್ಞಾ ಶಾರ್ಕ್ ಆಂದಿಸ್ ಥರಿವಲ್ಯಾಲ್ಯಾ ಆಮಾನಾ ಕ್ರಿಸ್ತಾಪ ಆಪ್ಲಿ ಸ್ವತಾಚಿ ಲೊಕಕರುನ್ ನಿವಡ್ಲಿತ.

12 ಮನ್ವುನ್ ಕ್ರಿಸ್ತಾವ ಆಂದಿಸ್ ಆಶಾ ಥೆವಲ್ಯಾಲಿ ಆಮಿ ತ್ಯಚೆ ಮೈಮಾಲಾ ವವ್ಯಾಳತ್ಯಾಲಿ ರಾಹ್ಯಾವ್ಹಯಿ ಮನ್ವುನ್ ಆಸ ಕೆಲ.

13 ಆನಿ ತುಮಿ ಸಾಹಿತ್ ಖರಿ ವಾಕ್ಯಾ ಐಕುನ್, ದೇವಾಚಿ ಲೊಕ ಜಾಲ್ಯಾಸಾ, ಬರಿ ಖಬರಿನಿ ತುಮಾನಾ ಸುಟ್ಕುಕ್ ಆನ್ಲಿ. ತುಮಿ ಕ್ರಿಸ್ತಾವ ಇಸ್ವಾಸ್ ಥೆವಲ್ಯಾಸಾ, ಆನಿ ದೇವಾನಿ ಆಪ್ಲು ವಾಗ್ದಾನ್ ಕೆಲ್ಯಾಲ ಪವಿತ್ರಾತ್ಮ ತುಮಾನಾ ದಿಲ್ಯಾಲ್ಯಾಸ್ ಲಾಗುನ್ ಆಪ್ಲಾ ಸಿಖಾ ಗಾಲ್ವುನ್ ವಳಕ್ ಕೆಲೆ.

14 ತ್ಯ ಆತ್ಮ ದೇವಾನಿ ಆಪಲ್ಯಾ ಸ್ವತಾಚಾ ಲೊಕಾನಾ ವಾಗ್ದಾನ್ ಕೆಲ್ಯಾಲಾ ಆಮಿ ಗಿಹ್ಯಾ ಸಾಟಿ ಪವಿತ್ರಾತ್ಮ ಖಾತ್ರಿ ಜಾಲ್ಯಾ ಸುಟ್ಕುಕ್ ವ್ಹತಿ ಮನ್ಡಾಯಾ ಪವಿತ್ರಾತ್ಮ ಆಮ್ಚಾ ಹಾಕಾಲಾ ಖಾತ್ರಿ ಜಾಲ್ಯಾ ಹ್ಯನಿಸ್ ದೇವಾಲಾ ಮೈಮಾ ಕರುಯಾ.

ಪೌಲಾಚ್ ಮಾಗ್ನ

15 ಮನ್ವುನ್ ಪ್ರಭು ಯೇಸುಪ ತುಮಚಾ ಇಸ್ವಾಸ್ ಆನಿ ಸಗ್ಗ ತ್ಯಚಾ ಲೊಕಾಂಚೆ ಸಾಟಿ ಆಸ್‌ಲ್ಯಾಲೆ ಮಾಯೆಚೆ ಗುಶ್ಟಿತ್ ಮೀ ಐಕ್‌ಲ್ಯಾ.

16 ಮೀ ತುಮ್ಮಿ ಸಾಟಿ ದೇವಾಲಾ ದನ್ಯವಾದ್ ಸಾಂಗಾಚ್ ಥಾಂಬಿವ್ನ್ ನಾಹಿ ಮಾಜಾ ಮಾಗ್‌ನ್ಯಾತ್ ತುಮಾನಾ ಯಾದ್ ಕರ್ತೊ.

17 ಮಿ ಮಾಗ್ನ ಕರ್ತೊ ಆಮಚಾ ಪ್ರಭು ಜಾಲ್ಯಾಲ್ಯಾಯೇಸು ಕ್ರಿಸ್ತಾಚಾ ದೇವ್ ತುಮಾನಾ ವಿವೇಕ್ ಆನಿ ದೈವಿಕ್ ದರ್ಶನಾಚಾ ಆತಮ್ಯಾಚ್ ಬಳ್ ದಿವುನಿ ಹ್ಯನಿ ತುಮಿ ತ್ಯಾ ಮೈಮೆಚಾ ಮೊಟ್ಯಾ ಬಾಲಾ ಸುಮಜುನ್ ಗಿಹ್ಯಾ ವ್ಹಯಿಲ್.

18 ಮಿ ಮಾಗಾಚ್ ಕ್ಯಾಮಂಜೆ ತುಮಚಾ ಮನಾತ್ಲ ಡೊಳ ಉಗಡುನ್, ತ್ಯಚಾ ಹಾಕಟೆನ್ಯಾಚಿ ಆಶಾ ಕಸ್ಲಿ ಮನ್ವುನ್ ಆನಿ ದೇವಾಚಾ ಪೊರಾಂಚಿಪ ಆಸಲ್ಯಾಲ್ಯಾ ಸ್ವಾಸತ್ಯಾಚಿ ಮೈಮಾ ಕಸ್ಲಿ ಮನ್ವುನ್.

19 ಆನಿ ಇಸ್ವಾಸಿ ಜಾಲ್ಯಾಲಿ ಆಮಿ ತ್ಯಚಿ ತಾಕತ್ ಕೃಪಿ ಮುಟಿ ಜಾಲೆ ತೀ ಆಪ್ಲಿಪ ಕಾಮ್ ಕರ್ತೆ ಹೀ ತಾಕತ್ ಆಪ್ಲಿಪ ಮೊಟೆ ತಾಕ್ತಿಚಿಗತ್ ಕಾಮ ಕರ್ನಾರ್ ಬಳ್ ಜಾಲ್ಯಾ.

20 ಹೆ ಮೊಟೆ ತಾಕ್ತಿನಿಸ್ ದೇವಾನಿ ಕ್ರಿಸ್ತಾಲಾ ಮರ್ನಾತ್ಲಿ ಉಟ್ಟುನ್, ಆನಿ ಸ್ವರ್ಗಾಚಾ ರಾಜಾತ್ ಆಪ್ಲೆ ಉಜವ್ಯಾಂಗ್ಲಿ ಬಸಿವ್ಲಾ.

21 ಪೈಲ ಫನ್ ಅಧಿಕಾರ್ ಸಾಮರ್ಥ್ಯ ಪ್ರಭುತ್ವ ತ್ಯೊ ಯನಾರ್ಚ್ಯಾ ಲೊಕಾತ್ ತ್ಯಲಾ ಪದ್ವಿ ದಿಲೆ.

22 ಆನಿ ದೇವಾನಿ ಸರ್ವ ಕ್ರಿಸ್ತಾಚಾ ಪಾಯಾತ್ ದಿವುನ್, ಮಂಡಳಿ ಸಾಟಿ ಸಗ್‌ಳ್ಕಾವ ತ್ಯಲಾ ಡುಯಿ ಕರುನ್ ಥರಿವ್‌ಲ್ಯಾ.

23 ಮಂಡಳಿ ಕ್ರಿಸ್ತಾಚ್ ಶರೀರ್ ಜಾಲೆ, ಸಗ್ಳೆ ತರನಿ ಸಗ್‌ಳ್ಕಾಲಾ ತ್ಯಚಿ ಸಗ್ಳೆ ಪುರ್ನ ಕರ್ತೆ.

2

ಮರಾನಾತ್ಲಿ ಜೀವಾಕ್ಡ

1 ಯಕಾ ಕಾಲಾತ್ ತುಮಿ ಅಪರಾದ್ ಆನಿ ಪಾಪಾಚಾ ಕರ್ನಾಂನಿ ಆತ್ಮಿಕಾಂನಿ ಮರುನ್ ಗೆಲ್ಯಾಸಾ.

2 ತ್ಯಾ ಯಳಾತ್ ತುಮಿ ಹ್ಯಾ ಲೊಕಾತಲ್ಯಾ ಬುರ್ಶಾ ಮಾರ್ಗಾಂನಿ ಚಾಲತ್ ತ್ಯಾ ಆತಮ್ಯಾಚೆ ಮಾಗ್ಣಿ ಚಾಲತಾಸಾ ವಾಯು ಮಂಡಳಾತ್ ಆದಿಕಾರ್ ಚಾಲಿವತ್ಯಾಲ್ಯಾ ಅಧಿಪತಿಲಾ ಮಂಜೆ ಕೊನ್ ದೇವಾಚಾ ಆಜ್ಞಾ ಪಾಳಿತ್ ನಾಹಿತ ತ್ಯಂಚಾತ್ ತ್ಯಸ್ ಆತ್ಮಕಾಮ್ ಕರ್ತ್ಯಾ.

3 ಆಮಿ ಸಗ್ಳಿ ಆಂಧಿ ತ್ಯಂಚೆಗತ್ ಹುತಾವ್, ಮನಾಚಾ ಆಶೆತ್ ಗಾವುನ್, ಶರೀರಾಚಾ ಆನಿ ಮನಾಚಾ ಆಶಾ ಫಾರಿಕ್ ಕರಿತ್ ಆಲಾವ್. ಆಮಿ ಸಾಹಿತ್ ದುಸ್‌ರ್ಟ್ಯಾಂಚೆಗತುಸ್ ಸಜ್ಜ್ ದೇವಾಚಾ ರಾಗಾತ್ ಗಾವಲ್ಯಾವ್.

4 ಫನ್ ದೇವಾಚಿ ದಯಾ ಮುಟಿ ಆನಿ ಆಮ್ಚಿಸಾಟಿ ಆಪ್ಲಿ ಮುಟಿ ಮಾಯಾ ದ್ಯಾವ್ಲೆ.

5 ತ್ಯಾ ಯಳಾತ್ ಪಾಪಾಚಾ ಕರ್ನಾಂನಿ ಆಮಿ ಆತ್ಮಿಕಾಂನಿ ಮರುನ್ ಗೆಲ್ಯಾವ್ ಕ್ರಿಸ್ತಾ ಸಂಗ ಆಮಾನಾಬಿ ಜಿತ್ತಿ ಕಿಲಿತ. ದೇವಾಚೆ ಕ್ರುಪೆನಿಸ್ ತುಮಿ ರಕ್ಯನ್ ಗೆತಲ್ಯಾಲಿ ಜ್ಞಾಲ್ಯಾಸಾ.

6 ಚಾಲ್ವಾಯಾ ಕ್ರಿಸ್ತ ಯೇಸುಚೆ ಯಕಿನಿ ದೇವಾನಿ ಆಮಾನಾ ಮೆಲ್ಯಾಲ್ಯಾತ್ಲಿ ಉರಿವಲ್ಯಾ ಆನಿ ಸ್ವರ್ಗಾತ್ ತ್ಯಚಿ ಸಂಗ ಬಸಿವ್ಲಿತ.

7 ತ್ಯನಿ ಆಮಾನಾ ಕ್ರಿಸ್ತ ಯೇಸುಪ ಹ್ಯಾ ಕಾಲತ್ಲಿ ಆನಿ ಯತ್ಯಾಲ್ಯಾ ಸಗ್ಳೆಳ್ಕಾ ಕಾಲಾತ್ ಆನಿ ಸಾಂಗಾಯಾ ವ್ಹಯಿತ್ ನಾಹಿ ಯವ್ಲಿ ತ್ಯಚಿ ಮುಟಿ ಕ್ರುಪಾ ಆನಿ ಮಾಯಾ ದಿಯಾ ಸಾಟಿ ತ್ಯನಿ ಆಸ ಕೆಲ.

8 ಇಸ್ವಾಸಾಸ್ಲಾಗುನ್ ಕ್ರುಪೆನಿಸ್ ತುಮಿ ರಕ್ಯನ್ ಗೆತಲ್ಯಾಸಾ. ಹೀ ರಕ್ಷೆನ್ ತುಮ್ಚಿಪ್ಲಿ ಆಲ್ಯಾಲಿ ನವ್ಲೆ ತ್ಯ ದೇವಾಚೆ ದಾನುಸ್.

9 ಹಿ ರಕ್ಷೆನ್ ಪುನ್ಯಾಚಾ ಕಾಮಾನಿ ಆಲ್ಯಾಲಿ ನವ್ಲೆ , ಮನ್ವುನ್ ವವ್ಯಾಳುನ್ ಗಿಹ್ಯಾ ಕುನಾಲಾಸ್ ಆವ್ಯಾಸ್ ನಾಹಿ.

10 ಆಮಿತರಿ ದೇವಾನಿ ಬನಿವಲ್ಯಾಲಿ ಜ್ಞಾಲ್ಯಾವ್ ದೇವಾನಿ ಆಂದಿಸ್ ಆಮಚಿಸಾಟಿ ಯವಜ್ಞಲ್ಯಾಲಿ ಚಾಂಗಲಿ ಕಾಮ ಕರತ್ಯಾಲಿ ವ್ಹಪುನ್ ಜಗಾಯಾ ವ್ಹಯಿ ಮನ್ವುನ್ ಯೆಸು ಕ್ರಿಸ್ತಾಪ ಸ್ರಸ್ಟಿ ಜ್ಞಾಲ್ಯಾವ್.

ಕ್ರಿಸ್ತಾಪ ಎಕುಸ್
(ಕೊಲೊಸ್ಸೆ 1:21-29)

11 ಜಲಾಮಲ್ಯಾ ದರ್ನಿ ತುಮಿ ಯೆಹುದಿ ನಸ್‌ಲ್ಯಾಲಿ ಜಾಲ್ತಾಸಾ ತ್ಯ ತುಮಾನಾ ಯಾದ್ ರಾಹುನಿ. ಶರಿರಾಲಾ ಮಾನ್ಸಾಪ್ಪಿ ಮುಂಜಿ ಕರುನ್ ಗಿಹುನ್ ಮುಂಜಿ ಮನ್ಹುನ್ ಗೆಥ್ಯಾಲ್ಯಾಂಚಿಪ್ಪಿ ಮುಂಜಿ ನಸಲ್ಯಾಲಿ ಮನ್ಹುನ್ ಗೆತಲ್ಯಾಸಾ.

12 ಮಾಗ್‌ಲ್ಯಾ ಕಾಲಾತ್ ತುಮಿ ಕ್ರಿಸ್ತಾಪ್ಪಿ ದುರ್ ಹುತ್ತಾಸಾ, ತುಮಿ ದೇವಾಪ್ಪಿ ನಿವಡ್‌ಲ್ಯಾಲಿ ಲೊಕ ವ್ಹಪುನ್ ನವ್ಲಾಸಾ, ದೇವಾನಿ ಆಪ್‌ಲ್ಯಾ ಲೊಕಾಸಂಗ ಕೆಲ್ಯಾಲ್ಯಾ ವಾಗ್ದಾನ್ ಕೆಲ್ಯಾಲ್ಯಾ ಕರಾರಾತ್ ತುಮಿ ವಾಟಿ ದಾರ್ ನವ್ಲಾಸಾ ಕಸ್ಲಿ ಆಶಾ ನಸ್‌ಲ್ಯಾಲಿ ಹುತ್ತಾಸಾ ಆನಿ ದೇವ್ ನಸ್‌ಲ್ಯಾಲಿ ಜಾಲ್ತಾಸಾ.

13 ಫನ್ ಆತಾತರಿ ತುಮಿ, ದೇವಾಪ್ಪಿ ದುರ್ ಹುತ್ತಾಸಾ ಕ್ರಿಸ್ತಾಚೆ ಬಲಿಚಾ ಕರ್ನಾನಿ ಕ್ರಿಸ್ತ ಯೇಸುಪ ಆಸ್‌ಲ್ಯಾಲೆ ಯಕಿತ್ ದೇವಾಚೆ ಭವಳ್ ಆನ್‌ಲ್ಯಾತ್.

14 ಯೆಹುದಿ ಆನಿ ಯೆಹುದಿ ನಸ್‌ಲ್ಯಾಲಿ ಯಕಾಮಕಾಲಾ ಆಡ್ಲಿ ಜಾಲ್ತಾ ಆನಿ ದುಯಿ ಜಾಲ್ಲಿ ತೀ ಕಸಿ ಮನ್‌ಲ್ಯಾವ ತ್ಯಂಚೆ ಮದ್ಲಿ ಯೇಕ್ ಭೀತ್ ಆಸ್‌ಲ್ಯಾಚೆಗತ್ ಹುತ್ತ. ಫನ್ ಕ್ರಿಸ್ತಾನಿ ಆಪ್ಲ ಸ್ವತಾಚ್ ಶರಿರ್ ಬಲಿದಾನ್ ಕರುನ್ ತೀ ಆಡ್ಲಿ ಜಾಲ್ಯಾಲಿ ಭೀತ್ ಪ್ಯಾಡ್ಲಿ.

15 ತ್ಯೊ ಯೆಹುದ್ಯಾಂಚ್ ಧರ್ಮಶಾಸ್ತ್ರಾರ್ ತ್ಯಚಾ ಆಜ್ಞಾ ಆನಿ ನೆಮಾ ಸಂಗ ನಾಹಿ ಕೆಲಿ, ದೊನ್ ಆಸ್‌ಲ್ಯಾಲ ಅಪ್ಲಿಪ ಎಕ್ ಕರುನ್ ನವ ಮಾನುಸ್ ಕೆಲ. ಆಸಾ ತ್ಯನಿ ಥಂಡ್ವನ್ ಕೆಲಾ.

16 ಅಮ್ಚಿವ ಆಸ್‌ಲ್ಯಾಲಾ ರಾಗ್ ಆಪ್ಲೆ ಶಿಲ್ಪಿವ ನಾಹಿಕರುನ್, ತೆ ಶಿಲ್ಪಿನ್ ಲಾಗುನ್ ಯೆಹುದ್ಯಾಂಚ್ ಆನಿ ಯೆಹುದಿ ನಸ್‌ಲ್ಯಾಲ್ಯಾಂಚ್ ಯಾಕುಸ್ ಶರೀರ್ ಕರುನ್ ದೇವಾಸಂಗ ಯಕಿ ಕೆಲೆ.

17 ಯವ್ಡಸ್‌ನವ್ಡ ತ್ಯನಿ ಯವುನ್ ದುರ್ ಆಸ್‌ಲ್ಯಾಲ್ಯಾ ತುಮಾನಾ ಆನಿ ಜವಳ್ಜಾನಾ ಸಮಾದಾನಾಚಿ ಬರಿ ಖಬರ್ ಸಾಂಗ್ಲಿ.

18 ಕ್ರಿಸ್ತಾಪ್ಪಿ ಯೆಹುದಿ ಆನಿ ಯೆಹುದಿ ನಸ್‌ಲ್ಯಾಲ ಆಮಿ ಆನಿ ತುಮಿ ಯಕುಸ್ ಆತ್ಮ ಗೆತಲ್ಯಾಲ ವ್ಹವುನ್ ಬಾಪ ಜಾಯಾ ವಾಟೆ ಜಾಲಿ.

19 ಆಸ ಆಸ್ಥಾನಾ ತುಮಿ ಹಿತ್ಲಿ ಮೊರ್ದ ಪರದೇಶ್ಲಿ ದುಸ್ಸಿಲೊಕ ವ್ಹಯಾಚೆ ಆಂದಿ ದೇವಾಚಾ ಪೊರಾಂಚೆ ಸಂಗ ಎಕಾಸ್ ಕುಟ್ಮಾತ್ಲಿ ದೇವಾಚಾ ಗರಾತ್ಲಿ ಜಾಲ್ಯಾಸಾ.

20 ಅಪೊಸ್ತಲ್ ಪ್ರವಾದಿ ಮಂಥ್ಯಾಲ್ಯಾ ಪಾಯಾವ ತುಮಿ ದೇವ್ಯಾಚೆಗತ್ ಬ್ಯಾಂದ್‌ಲ್ಯಾ ಕ್ರಿಸ್ತ ಯೇಸುಸ್ ವ್ಹಯಿ ಜಾಲ್ಯಾಲಾ ಕೊನ್ಯಾಚಾ ದೊಂಡಾ.

21 ತ್ಯಚಿಪ ಬಿತಿಚ್ ಸಗ್ಳ ಭಾಗ್ ಯಕಾಲಾ ಎಕ್ ಮಿಳುನ್, ಬಿತ್ ವಾಡತ್ ಪ್ರಭುಪ ಪವಿತ್ರ ದಿವುಳ್ ವ್ಹತಿ.

22 ತ್ಯಚಿಪ ತುಮಿ ಸಾಹಿತ್ ಪವಿತ್ರಾತ್ಮಾಸ್ ಲಾಗುನ್ ದೇವಾಲಾ ರಾಹ್ಯಾಲಾದಿವುಳ್ ವ್ಹಯಿತ್ ಆಮ್ಚಿ ಸಂಗ ಬಾಂದುನ್ ಗಿಹಿತ್ ಹಾಸಾ.

3

ಯೆಹುದಿ ನಸ್‌ಲ್ಯಾನಾ ಸಿಕ್ಕಿವ್‌ತ್ಯಾಲಾ ಪೌಲ್

1 ಆಸ ಆಸ್ಥಾನಾ ಪೌಲ್ ಮಂಥ್ಯಾಲ್ಯಾ ಮೀ ಯೆಹುದಿ ನಸ್‌ಲ್ಯಾಲ್ಯಾ ತುಮ್ಮಿಸ್ ಲಾಗುನ್ ಕ್ರಿಸ್ತ ಯೇಸುಸಾಟಿ ತುರುಂಗಾತ್ ಗೆಲೊ.

2 ತುಮ್‌ಚಿ ಸಾಟಿ ಕಾಮ್ ಪಾರ್ ಕರಾಯಾ ದೇವಾನಿ ಮನಾ ಕುಪೆನಿ ದಿಲ್ಯಾಲಾ ರಾಜ್ ಬಾರ್ ತುಮಿ ಐಕ್‌ಲ್ಯಾಸಾ,

3 ತ್ಯನಿ ಖರ ಚುರುನ್ ನಸ್‌ಲ್ಯಾಲ ಮನಾ ಸಾಂಗ್‌ಲ್ಯಾ ಮನ್ವುನ್ ತ್ಯಚೆ ಗುಸ್ತಿತ್ ಮೀ ಆಂದಿಸ್ ತುಮಾನಾ ಬಾರಿಕ್ ಕರುನ್ ಲಿವ್‌ಲ್ಯಾ.

4 ಆನಿ ಮಿ ಲಿವ್‌ಲ್ಯಾಲ ತುಮಿ ವಾಙ್ವುನ್ ಬಗ್‌ಲ್ಯಾವ ಕ್ರಿಸ್ತಾಚೆ ಖರಾಚೆ ಗುಸ್ತಿತ್ ಮನಾ ಆಸ್‌ಲ್ಯಾಲ ಗಿಹುನ್ ತುಮಿ ಸಮಜ್ಞುನ್ ಗಿಹ್ಯಾ ವ್ಹಯಿಲ್.

5 ತೀ ಗುಟ್ ಹ್ಯಾ ಕಾಲಾತ್ ದೇವಾಚಾ ಪವಿತ್ರ ಅಪೊಸ್ತಲಾನಾಬಿ ಪ್ರವಾದಿನಾಬಿ ಪವಿತ್ರಾತ್ಮಾನಿ ಸಾಂಗ್‌ಲ್ಯಾ ಶಾರ್ಕ್ ದುಸ್ರ್ಯಾ ಕಾಲಾತ್ ಆಸ್‌ಲ್ಯಾಲ್ಯಾಲೊಕಾನಾ ಸಾಂಗ್ಲನಾಹಿ.

6 ತಿ ಗುಟ್ ಕ್ಯಾಮಂಜೆ, ಯೆಹುದಿ ನಸ್‌ಲ್ಯಾಲಿ ಬರೆ ಖಬ್ರಿಸ್ ಲಾಗುನ್ ಕ್ರಿಸ್ತ ಯೇಸುವ ದೇವಾಚಾ ಪೊರಾ ಸಂಗ್ತಿ ಯಕಾಸ್ ಶರೀರಾಚ್ ಭಾಗ್, ಸಬ್ದಾತ್ ವಾಟಿದಾರ್ ಜಾಲ್ಯಾತ.

7 ದೇವಾನಿ ಆಪ್ಲೆ ತಾಕ್ತಿನಿ ಮನಾ ದಿಲ್ಯಾಲಿ ತ್ಯಚೆ ಕ್ರುಪೆಚಾ ದಾನಾನಿ ಮೀ ಹೇ ಬರೆ ಖಬ್ರಿಲಾ ಸೇವಕ್ ಜಾಲೊ.

8 ಸಗ್ಳ್ಯಾ ದೇವಾಚಾ ಲೊಕಾತ್ ಮಿ ಕಾಯ್ ನವ್ ಮನ್ವುನ್ ಜಾಲೊ ತರಿ ಕ್ರಿಸ್ತಾಚಾ ಸಮಜತ್ ನಸ್‌ಲ್ಯಾಲಿ ಸಾವ್ಕರ್ಕಿಚಿ ಬರಿ ಖಬರ್ ಯೆಹುದಿ ನಸ್‌ಲ್ಯಾಲ್ಯಾ ಲೊಕಾನಾ ಸಾಂಗಿ ಶಾರ್ಕ್ ಯೆಕ್ ಸೌಬಾಗ್ಯ ಮನಾ ದಿಲೆ

9 ತಸಸ್ ಸರ್ವ ಉತ್ಪನ್ ಕೆಲ್ಯಾಲ್ಯಾ ದೇವಾಪ ಪೈಲೆ ದರ್ನಿ ಘುರುನ್ ಆಸ್‌ಲ್ಯಾಲ್ಯಾ ಖರಲ್ಯಾಚಿ ಯವಜ್ಞ ಸಗ್ಳ್ಯಾನಾ ದಿಲೆ.

10 ಮನ್ವುನ್ ಸಭೆಸ್ ಲಾಗುನ್ ದೇವಾಚೆ ಗಿನ್ಯಾನ್ ತ್ಯಚಿ ಸಾವ್ಕರ್ಕಿ ಆತಾ ಹ್ಯಾ ಸ್ವರ್ಗಾತ್ ಆಸ್‌ಲ್ಯಾಲ್ಯಾ ರಾಜಾನಾ, ಅಧಿಕಾರಿನಾ ದಾವುನ್ ದಿಯಾ ವ್ಹಯಿ ಜಾಲ್ಲ್ಯಾ.

11 ಆಮ್ಚಾ ಪ್ರಭು ಯೇಸು ಕ್ರಿಸ್ತಾಸ್ ಲಾಗುನ್ ಆಪ್ಲು ಖಾಯಿಮ್ಚಾ ಉದ್ದೆಶಾಚೆಗತ್ ದೇವಾನಿ ಹ್ಯ ಸಗ್ಳೆ ಕೆಲ.

12 ದೇವಾಚೆ ಮೊರ್ವ್ಡುಮಿಳಾಯಾ ಆಮಾನಾ ಆಸ್‌ಲ್ಯಾಲಿ ಆಶಾ ಧೀರ್ ಕ್ರಿಸ್ತಾವ ಥೆವ್‌ಲ್ಯಾಲ್ಯಾ ಇಸ್ವಾಸಾಸ್ ಲಾಗುನ್ ತ್ಯಚಿಪಸ್ ಆಮಾನಾ ಹಾ.

13 ಮನ್ವುನ್ ತುಮ್ಮಿಸ್ ಲಾಗುನ್ ಮನಾ ಆಲ್ಯಾಲಾ ತರಾಸ್ ಬಗುನ್ ತುಮಿ ಭಿಹು ನಕೊಸಾ ಮನ್ವುನ್ ತುಮ್ಮಿಪ ಮಾಕ್ತೊ. ಹ್ಯ ತರಾಸ್ ತುಮಾನಾ ಮರ್ಯಾದ್ ಆಂತ್ಯಾತ.

ಎಫೆಸಾತ್‌ಲ್ಯಾಂಚೆ ಸಾಟಿ ಮಾಗ್ನ್

14 ಆಸ ಆಸ್ಲಾನಾ. ತ್ಯಾಬಾಚೆ ಮೊರ್ವ್ಡುಮೀ ನಡ್ಗ ಟಿಕ್ಪುನ್,

15 ತ್ಯಾಬಾಪ್ಪಿ ದರ್ತಿವ ಆನಿ ಸ್ವರ್ಗಾತ್ ಆಸ್‌ಲ್ಯಾಲ್ಯಾ ಪರ್ತೆಕ್ ಕುಟ್ಮಾನಿ ನಾವ್ ಗೆತಲ್ಯಾ

16 ತುಮಿ ದೇವಾಚಾ ಆತಮ್ಯಾಸ್ ಲಾಗುನ್ ಮನಾತ್ ವಿಶೆಶ್ ಬಳ್ ಗಿಹ್ಯಾಲಾ ಮಾಗ್ನ್ ಕರ್ತೊ,

17 ಕ್ರಿಸ್ತ ತುಮ್ಮಾ ಇಸ್ವಾಸಾಸ್ ಲಾಗುನ್ ತುಮ್ಮಾ ಮನಾತ್ನಿ ಹಾ ಮನ್ವುನ್, ತ್ಯೊ ಆಫ್ಲೆ ಮೊಟೆ ಮೈಮೆಚೆಗತ್ ದಿವುನಿ.

18 ತುಮಿ ದೇವಾಚೆ ಮಾಯೆತ್ ರಾಹುನ್, ದೇವಾಚಾ ಪೊರಾಂಚೆ ಮಾಯೆತ್ ರಾಹುನ್ ಕ್ರಿಸ್ತಾಚಿ ಮಾಯೆ ಕೃಪ್ತಿ ರುಂದ್, ಲಾಮ್, ಉಚ್ಕ್, ಖೊಲ್ ಸಮಜುನ್ ಗಿಹ್ಯಾ ಬಳ್ ತುಮ್ಮಿಪ ರಾಹುನಿ.

19 ಮಾಜೆ ಸಮಾಜುಕಿವ್ನಿ ಚಡ್ ಆಸ್‌ಲ್ಯಾಲಿ ಕ್ರಿಸ್ತಾಚಿ ಮಾಯಾ ಸಮಾಜುನ್ ಗಿಹುನ್, ದೇವಾಚಾ ಸರ್ವ್ಯಾ ಪರ್ತ್ಯಾತ್ ಪುರ್ನವ್ಡಯಿ ಸಾರ ದೇವ್ ತುಮಾನಾ ದಿವುನಿ ಮನ್ವುನ್ ತ್ಯಚಿಪ ಮಾಕ್ತೊ.

20 ಆಮ್ಮಿಪ ಕಾಮ್ ಕರ್ನಾರಾ ಆಪ್‌ಲ್ಯಾ ಬೆಳಾಚೆಗತ್ ಆಮಿ ಮಾಗ್‌ಲ್ಯಾಲ್ಯಾನ್ ಆನಿ ಯವಜ್‌ಲ್ಯಾಲ್ಯಾನ್ ಮೊಟೆ ಕಾಮ ಕರಾಯಾ ಶಕ್ಯಾ ಆಸ್‌ಲ್ಯಾಲ್ಯಾ ದೆವಾಲಾ

21 ಸಭೆತ್ ಆನಿ ಕ್ರಿಸ್ತ ಯೇಸುಪ ಪಿಡನ್ ಪಿಡಿ ಪರ್ತ್ಯಾತ್ ಖಾಯಿಮ್ ಮೈಮಾ ವ್ಹವುನಿ. ತಸಸ್ ವ್ಹವುನಿ.

4

ಶರೀರಾತ್ ಯಕಿ

1 ತುಮಾನಾ ದೇವಾನಿ ಹಾಕಟ್‌ಲ್ಯಾತ ತ್ಯಚಿಸ್ಲಾಗುನ್ ಚಾಂಗ್ಲಿ ಜೀವ್ನಾ ಕರಾಯಾ ವ್ಹಯಿಸಾ ಮನ್ವುನ್, ಪ್ರಭುಚೆ ಸೇವೆಸ್ಲಾಗುನ್ ತುಂಗಾತ್ ಆಸ್‌ಲ್ಯಾಲಾ ಮೀ ತುಮಚಿಪ ಮಾಕ್ತೊ.

2 ತುಮಿ ಬಾರಿಕ್ ವ್ಹವುನ್, ಸಾದಿ ವ್ಹವುನ್ ಖುಬ್ ಥಂಢ್ವನಾನಿ ರಾಹುನ, ಮಾಯೆನಿ ಯಕಾ ಮಕಾಲಾ ಸುಸ್ವುನ್‌ಗೆವಾ.

3 ಥಂಢ್ವನಾಚಾ ಬಾಂದ್ಪಾತ್ ಗಾವುನ್ ಪವಿತ್ರಾತ್ಮಾನಿ ಜಾಲ್ಯಾಲಿ ಯಕಿ ರಾಕಾಯಾ ಹುರ್ಪ್ಪಾನಿ ರಾವ್ತಾ.

4 ತುಮಾನಾ ಹಾಕಟ್ಲೆತ ತವಾ ಯಕಸ್ ಆಸೆಸಾಟಿ ಹಾಕಟ್‌ಲ್ಯಾಚೆಗತ್, ತುಮಿ ಸಗ್ಳಿ ಯಕಾಸ್ ಶರೀರಾತ್ ಮಿಸಾಳ್ಕಾಲಿ, ಯಾಕುಸ್ ಆತ್ಮಗೆತಲ್ಯಾಲಿ,

5 ತುಮಾನಾ ಸಗ್ಳಾನಾ ಪ್ರಭು ಯೊಕುಸ್, ಇಸ್ವಾಸ್ ಯೊಕುಸ್, ಬಾಪ್ತಿಸ್ಮಾಯೆಕುಸ್,

6 ಸಗ್ಳಾನಾ ಬಾ ಜಾಲ್ಯಾಲಾ ದೇವ್ ಯೊಕುಸ್. ತ್ಯೊ ಸಗ್ಳಾಂಚೆ ವರ್ ರಾಡ್ಯಾಲಾ, ಸಗ್ಳಾಂಚಾಪ್ಪಿ ಕಾಮ ಕರ್ನಾರಾ, ಸಗ್ಳಾಂಚಿ ರಾನಾರಾ ಜಾಲ್ಯಾ

7 ಫನ್ ಕ್ರಿಸ್ತಾಚಾ ವರಾಚಾ ಮಾಪಾ ಶಾರ್ಕ ಪರತೆಕಾಲಾ ಕುಪಾವರ ದಿಲ್ಯಾ

8 ಮನ್ವುನ್ ಪವಿತ್ರ ಗ್ರಂತಾತ್ ಆಸ ಲಿವಲ್ಯಾ
ತ್ಯೊ ವರ್ ಗೆಲಾತವಾ
ಆಪ್ಲು ತುರುಂಗಾತ್‌ಲ್ಯಾನಾ ದರುನ್ ನಿವ್ವುನ್
ಮಾನ್ಸಾನಾ ವರ ದಿಲಿತ.

9 ವರ್ ಗೆಲಾ ಮನ್ವುನ್ ಸಾಂಗ್‌ಲ್ಯಾಲ್ಯಾಚಾ ಅರ್ಥ ಕ್ಯಾ? ದರ್ತಿಚಾ ತ್ಯಾ ಜಾಗ್ಯಾತ್ ಉತಾರ್ಲ್ಲಾ ಹುತಾ ಮನ್ವುನ್ ಸಾಂಗ್‌ಲ್ಯಾ ಶಾರ್ಕ ಜಾಲನಾಹಿ ಕ್ಯಾ?

10 ಖಾಲ್ ಉತ್ರನ್ ಆಲ್ಯಾಲಾ, ತ್ಯೊಸ್ ಸಗ್ಳೆಕ್ಡ ರಾಹ್ಯಾ ಸಗ್ಳ್ಯಾ ಸ್ವರ್ಗಾಂಚಿ ವೈಲ್ಯಾ ರಿಕಾನ್ಯಾವ ಚಡ್ಲಾ.

11 ತ್ಯನಿ ಥೊಡ್ಯಾನಾ ಅಪೊಸ್ತಲ್, ಥೊಡ್ಯಾನಾ ಪ್ರವಾದಿ, ಥೊಡ್ಯಾನಾ ಬರಿ ಖಬರ್ ಸಾಂಗ್ಲಾರ, ಥೊಡ್ಯಾನಾ ಸಭಾ ಚಾಲಿವ್ಕಾರ, ಸಿಕಿವ್ಕಾರ ತರಿವ್ಲ.

12 ಸೆವೆಚಾ ಕಾಮಾಸಾಟಿ ದೆವಾಚಾ ಲೊಕಾನಾ ತಯಾರ ಕರಾ ಕ್ರಿಸ್ತಾಚೆ ಶರಿರ್ ಬಾಂದಾಯಾಸಾಟಿ, ತ್ಯನಿ ಆಸ ಕೆಲ

13 ಮನ್ವುನ್ ಸಗ್ಳಿ ಯೆಕಾಸ್ ಇಸ್ವಾಸಾನಿ ದೇವಾಚಾ ಲೇಕಾಚೆ ಗುಶ್ಟಿತ್ ಗಿನ್ಯಾನಾನಿ ಯೇಕ್ ವ್ಹಯಿ ಪರ್ಯಾತ್ ಹಿ ಸೇವಾ ಮೊರ್ಲ್ಲ್ ಜಾಯಾ ವ್ಹಯಿ. ಆಮಿ ಪರಿ ಪುರ್ನ್ ವ್ಹಯಿ ಪರ್ಯಾತ್ ಮಂಜೆ ಕ್ರಿಸ್ತಾಚಾ ಸರ್ವ್ಯಾತ್ ಪೊಚ್ ಪರ್ಯಾತ್ ಮೊರ್ಲ್ಲ್ ಜಾಯಾ ವ್ಹಯಿ.

14 ಮನ್ವುನ್ ಆಮಿ ಹಿತ್ಲಿ ಮೊರ್ಲ್ಲ್ ಮುಲಾಚೆಗತ್ ನಸಾವ, ಬುರಶಾ ಮಾನ್ಸಾಚಾ ಕಪಟ್ಟನಾನಿ, ಪಿತುರಿತ್ ಗಾವುನ್, ತರ ತರಚಾ ಸಿಕಿವ್‌ನ್ಯಾನಿ ಕಂಗಾಲ್ ವ್ಹವುನ್ ವಾರ್ಚ್ಯಾನಿ ಹಿಕ್ಡ ತಿಕ್ಡ ಫಿರ್ತ್ಯಾಚೆಗತ್ ವ್ಹಯಾಚೆ ಆಂದಿ,

15 ಮಾಯಾನಿ ಖರತ್ಯ ಬೊಲತ್ ಸಗ್ಗೆ ಗುಸ್ವಿತ್ತಿ ಡುಯಿ ಜಾಲ್ಯಾಲ್ಯಾ ಕ್ರಿಸ್ತಾಪ ವಾಡುಯಾ.

16 ಶರೀರ್ ಸಗ್ಗೆ ತ್ಯಚಿಪ್ಪಿ ಪರತೆಕ್ ಸಾಂದ್ಯಾನಿ ಗಟ್ ಜುಡುವುನ್ ಗಿಹುನ್ ಎಕ್ ರಾಹುನ್ , ಪರತೆಕ್ ಭಾಗ್ ಆಪ್ಲ ಆಪ್ಲ ಕಾಮ್ ಕರ್ತಲ್ಯಾಸ್ ಲಾಗುನ್ ಶರೀರ್ ಮಾಯೆತ್ ವಾಡತ್ ಆರೊಗ್ಯವಾನ್ ರಾತ.

ಕ್ರಿಸ್ತಾಪ ನವಾ ಜೀವ್ನ್
(ಕೊಲೊಸ್ಸೆ 3:5-17)

17 ಮನ್ವುನ್ ಮೀ ಪ್ರಭುಪ ಸಾಂಗಾಚ್ ಕ್ಯಾ ಮಂಜೆ ಇಸ್ವಾಸಾತ್ ನಸಲ್ಯಾಲಿ ಲೊಕ ಫಾಲತ್ಯಾಸಾರಿ ತುಮಿ ಹಿತ್ತಿ ಮೊರ್ದು ಫಾಲುನಾಹಿ. ತೀ ಉಪೆಗ್ ನಸಲ್ಯಾಲಿ ಬುದಿನಿ ಫಾಲತ್ಯಾತ.

18 ತ್ಯಂಚಾ ಮನಾನಾ ಆಂದಾರ್ ಆಲ್ಯಾ ತೀ ಆಪ್ಲೆ ಹಾಟಿಸ್ಲಾಗುನ್ ಆನಿ ಆಪ್ಲ್ಯಾ ಖುಳ್ಕಾ ಪನಾಸ್ಲಾಗುನ್ ದೇವಾಪ್ಲಿ ಗಾವ್ವಾರ್ಯಾ ಜೀವ್ನ್ಪಾತ್ ದುರ್ ಜಾಲ್ಯಾತ.

19 ತೀ ಮರ್ದಾದ್ ಸುಡುನ್ ಆಪಲ್ಯಾಲಾ ಬುರಶಾಚಾ ತಾಬ್ಯಾತ್ ದಿವುನ್ ಹೊರ ಫನ್ ಕರತ್ಯಾಲಿ ಜಾಲ್ಯಾತ.

20 ಫನ್ ತುಮಿ ತರಿ ಕ್ರಿಸ್ತಾಚೆ ಗುಸ್ವಿತ್ ತಸ್ಲ ಸಿಕ್ಲಾ ನಾಹಿಸಾ.

21 ಕಾ ಮಂಜೆ ಖರತ್ಯಾನಿಸ್ ತುಮಿ ತ್ಯಚೆ ಗುಶ್ಟಿತ್ ತುಮಿ ಐಕ್ಲ್ಯಾಸಾ ಆನಿ ಯೇಸುವ ಆಸ್ಲ್ಯಾಲ್ಯಾ ಖರತ್ಯಾತ್ ತುಮಿ ಸಿಕ್ಲ್ಯಾಸಾ.

22 ಮನ್ವುನ್ ತುಮಿ ತುಮ್ಚೆ ಪೈಲೆ ಫಾಲ್ತುಕಿಶಾರ್ಕಿ ಫಾಲಾಚೆ ಆಂದಿ ತಿ ಸೊಡಾಯಾ ವ್ಹಯಿಸಾ. ತಿ ಕಪಟ್ಟನಾಚೆ ಆಶಾನಿ ನಾಸ್ ವ್ಹತ್ಯಾಲಿ.

23 ತುಮಿ ತುಮ್ಚೆ ಮನ್ ಪುರ ನವಿನಿ ಬದ್ಲಾ.

24 ಆನಿ , ನವಾ ಸಭಾವ್ ಗೆವಾ ತ್ಯೊ ಸಭಾವ್ ದೇವಾ ಶಾರ್ಕಾ ಖರತ್ಯಾನಿ ನಿಯತಿಚಾ ವ್ಹಪುನ್, ಪವಿತ್ರ ಕೆಲ್ಯಾ.

25 ಮನ್ವುನ್ ಪರತೆಕ್ ಯೊಕ್ ಆಪ್ಲ್ಯಾ ಯಕಾ ಮಕಾಚೆ ಸಂಗ ಲಬಾಡ್ ಸುಡುನ್ ಖರತ್ಯ ಬುಲುನಿ. ಕಾ ಮಂಜೆ ಆಮಿ ಪರತೆಕ್ ಜಾನ್ ಯಕಾಸ್ ಶರೀರಾಚ್ ಭಾಗ್ ಜಾಲ್ಯಾವ್.

26 ರಾಗ್ ಕೆಲಾಸಾತರಿ ಪಾಪ್ ಕರುನಕೊಸಾ, ದೀಸ್ ಮಾವ್ವಾಚೆ ಆಂದಿ ತುಮ್‌ಚಾ ರಾಗ್ ನಿವ್ಲುನಿ.

27 ಸೈತಾನಾಲಾ ಭಾಗಾ ದಿವುನಕೊಸಾ.

28 ಚುರಿ ಕರ್ನಾರಾ ಹಿತ್ಲಿ ಮೊರ್ಚ್ಚುರಿ ಕರಾಚೆ ಆಂದಿ ಚಾಂಗ್ಲ ಕಾಮ್ ಕರುನಿ. ತವಾ ಗರಿಬಾನಾ ದಿಯಾ ತ್ಯಲಾ ವ್ಹನಾರ್.

29 ತುಮ್ಮಾ ತೊಂಡಾತ್ಲಿ ಕಸ್ಲಸ್ ಬುರ್ಸ ಸಬಾತ್ ಯವುನಾಹಿತ. ಭಕ್ತಿ ವಾಡಾಯಾ ವ್ಹಯಿಜಾಲ್ಯಾಲ್ಯಾ ಬೊಲ್ಯಾ ಬೊಲ್ಯಾವ ಐಕ್‌ತ್ಯಾಲ್ಯಾನಾ ಬರ ರಾಹಿಲ್.

30 ದೇವಾಚಾ ಪವಿತ್ರಾತ್ಮಾಲಾ ದುಕ್ವು ನಕೊಸಾ. ತ್ಯಚಿಷ್ನಿನ್ ಸುಟ್ಕುಕಿಚಾ ದಿಸಾಸಾಟಿ ಸಿಕಾ ಗೆತಲ್ಯಾಸಾನವ್ವ.

31 ಸಗ್ಳ ವಾದ್, ರಾಗ್, ಸಂತಾಪ್, ಬಾಂಡಾನ್, ನಿಂದಾ ಹ್ಯ ಸಗ್ಳೆ ತರಚ್ ನೀಚ್ ಪನ್ ತುಮ್ಮಿಷ್ಟಿ ದುರ್ ಕರಾ.

32 ಹ್ಯಚೆ ಬದಲ್ ಯಕಾಮಕಾಸಂಗ ದಯೆನಿ, ಕರ್ನಾನಿ ರಾವ್ತಾ ದೇವಾನಿ ತುಮಾನಾ ಕ್ರಿಸ್ತಾಪ ಮಾಪ್ ಕೆಲ್ಯಾ ಶಾರ್ಕ ತುಮಿ ಯಕಾ ಮಕಾಲಾ ಮಾಪ್‌ಕರಾ.

5

ಉಜಿಡಾತ್

1 ತುಮಿ ದೇವಾಚಿ ಮಾಯೆಚಿ ಪೊರ ಜಾಲ್ಯಾಸಾ ಮನ್ವುನ್ ತುಮಿ ತ್ಯಚೆಗತ್ ಘಾಲಾಯಾ ವ್ಹಯಿಸಾ.

2 ಕ್ರಿಸ್ತಾನಿ ಆಮ್ಚಿ ಮಾಯಾ ಕಿಲಿ ಆಮ್ಚೆ ಸಗ್ಳಾಂಚೆ ಸಾಟಿ ಆಪ್‌ಲ್ಯಾಲಾಸ್ ದೇವಾಲಾ ಚಾಂಗಲ್ಯಾ ವಾಸಾಚಿ ದಿನ್ಕಿ ಯಜ್ಜ ದಿಲ್ಯಾ ಶಾರ್ಕ ತುಮಿ ಮಾಯೆನಿ ಘಾಲಾ.

3 ವ್ಯಭಿಚಾರ್ ಆನಿ ಕಸ್ಲೆ ತರಸ ಬುರ್ಸ ಪನ್ ನಾಹಿತ ಪೈಶಾಚಿ ಆಶಾ ಹ್ಯಾಂಚಿ ಖಬರ್ ತುಮ್ಮಿಪ ರಾವುನಾಹಿ, ಹ್ಯಾತ್ಲಿ ದುರ್ ರಾಹ್ಯಾಚ್ ದೇವಾಚಾ ಪೊರಾನಾ ಬರ.

4 ಬುರ್ಶಾ ಬೊಲ್ಯಾ ಖುಳ್ಕಾ ಬೊಲ್ಯಾ ನಿಂದಾ ಹಿ ನಕೊತ. ಹಿ ದೇವಾಲಾ ಆವ್ಡತ್ನಾಹಿತ ಹ್ಯಂಚೆ ಬದಲ್ ತ್ಯಲಾ ಕ್ರತಜ್ಞತಾಸ್ತುತಿ ಕರಾ.

5 ವ್ಯಭಿಚಾರಿಲಾ , ಬುರ್ಸೆ ಚಾಳಿಚಾಲಾ, ಪಾಶಾನ ಪುಞ್ತ್ಯಾಲ್ಯಾಲಾ ಕ್ರಿಸ್ತಾಚಾ ಆನಿ ದೇವಾಚಾ ರಾಜಾತ್ ವಾಟ್ನಿ ನಾಹಿ ಮನ್ವನ್ ತುಮಾನಾ ಖರ ಟಾವ ರಾವುನಿ.

6 ಆದಾರ್ ನಸಲ್ಯಾಲ್ಯಾ ಬೊಲ್ನ್ಯಾನಿ ಕುನಿ ತುಮಾನಾ ಪಸ್ವನಾಹಿ, ಆಸ್ಲ್ಯಾ ಕಾಮಾಸ್ಲಾಗುನ್ ದೇವಾಚಾ ರಾಗ್ ತ್ಯಚ್ ಐಕ್ಲ್ಯಾ ನಸಲ್ಯಾಲ್ಯಾವ್ನಿ ಯತೊ.

7 ಮನ್ವನ್ ತುಮಿ ತ್ಯಂಚಿ ಸಂಗ ಎಕ್ ವ್ಹವು ನಕೊಸಾ.

8 ಕಾ ಮಂಜೆ ತುಮಿ ಮಾಗ್ಲ್ಯಾ ಕಾಲಾತ್ ಆಂದಾರಾತ್ ಹುತಾಸಾ, ಫನ್ ಆತಾ ತುಮಿ ಪ್ರಭುಪ ರಾವುನ್ ಉಜೀಡ್ ಜಾಲ್ಯಾಸಾ. ಉಜೀಡಾತಲ್ಯಾಂಚಿಗತ್ ಫಾಲಾ.

9 ಉಜೀಡಾಚ್ ಪಳ್ ಮಜ್ಜತೀತ್ ನೀಯೆತೀತ್ ಖರತ್ಯಾತ್ ದಿಸುನ್ ಯತ.

10 ಪ್ರಭುಲಾ ಕಶಾನಿ ಸಂತೊಸ್ ವ್ಹಯಿಲ್ ಹ್ಯಚಿ ಪಾರಕ್ ಕರಾ.

11 ಉಪೇಗ್ ನಸಲ್ಯಾಲ್ಯಾ ಆಂದಾರಾಚಾ ಕಾಮಾತ್ ವಾಟದಾರ್ ವ್ಹವು ನಕೊಸಾ ತೀ ಉಜೀಡಾಸ್ ಆನಾ.

12 ತೀ ಲೊಕ ಚುರುನ್ ಕರ್ತ್ಯಾಲ್ಯಾ ಕಾಮಾಚ್ ಸಾಂಗಾಯಾಬಿ ಲಾಜ್ವಾಟೆ.

13 ಉಜೀಡಾತ್ ಸಗ್ಳ್ಯಾ ಕಾಮಾಚ್ ಖರ ಘುನ್ ಬಾಹಿರ್ ಪಡ್ತ್ಯಾತ.

14 ಕಾ ಮಂಜೆ ಸಗ್ಳೆ ಬಾಹಿರ್ ಪ್ಯಾಡ್ನಾರಾ ಉಜೀಡುಸ್ ,

ನಿಜಲ್ಯಾಲ್ಯಾ ಜಾಗಾ ಹೊ!

ಮೆಲ್ಯಾಲ್ಯಾತ್ನಿ ಉಟ್!

ತವಾ ಕ್ರಿಸ್ತಾಚಾ ಉಜಿಡ ತುಜಿಪ ದಿಸಲ್.

15 ಮನ್ವನ್ ತುಮಿ ಕಸ ಜಗಾಚ್ಯ ಶಾರ್ಕ್ ಬಗಾ. ಮಿಳ್ಕಾಂಚಿಗತ್ ಜಗು ನಕೊಸಾ ಶಾನ್ಯಾಂಚಿಗತ್ ವ್ಹವಾ.

16 ಹೇ ತುಮಿ ಆಸಲ್ಯಾಲ ದಿಸ್ ಬುರ್ಸ ಹಾತ ಮನ್ವನ್ ಯೊಳ್ ಹಾಳ್ ಕರಾಚೆ ಆಂದಿ ಉಪೇಗ್ ಕರಾ.

17 ಆನಿ ಮಿಳ್ಕಾಚೆಗತ್ ಫಾಲಾಚ್ ಆಂದಿ ಪ್ರಭುಚ್ ಮನ್ ಕ್ಯಾಮನ್ವನ್ ಸಮಜುನ್ ಗೆವಾ.

18 ದರಾಕ್ಷಿಚಾ ರಸ್ ಪಿವುನ್ ಜಿಂಗತ್ ರಾವುನಕೊಸಾ. ತ್ಯನಿ ಹಾಳ್ ವ್ಹಯಾ ವ್ಹತ್ತ. ಫನ್ ಪವಿತ್ರಾತ್ಮಾನಿ ಬರುನ್,

19 ಕೀರ್ತನಾನಿ, ಸ್ತುತಿ ಗಿತಾನಿ, ಮನಾತಲ್ಯಾ ಗಿತಾಂಚಾನಿ ಯಕಾಮಕಾಸಂಗ ಬೊಲಾ ತುಮ್ಮಾ ಮನಾತ್ ಪ್ರಭುಲಾ ವವ್ಯಾಳಾ.

20 ಕವಾಬಿ ಸಗ್ಳ್ಯಾ ಕಾಮಾಸಾಟಿ ಆಮ್ಮಾ ಪ್ರಭು ಯೇಸು ಕ್ರಿಸ್ತಾಚಾ ನಾವಾನಿ ಬಾ ದೇವಾಲಾ ಸ್ತೊತ್ರಕರಾ.

ಫೊಬಯ್

(ಕೊಲೊಸ್ಸೆ 3:18—4:1)

21 ಕ್ರಿಸ್ತಾಚಾ ಭ್ಯಾನಿ ರಾಹುನ್, ಯಕಾ ಮಕಾಚಾ ಆಧಾರಾನಿ ರಾವ್ವಾ

22 ಬ್ಯಾಯ್ಕಾನು, ತುಮಿ ಪ್ರಭುಲಾ ಕಸಿ ತಸಿ ತುಮ್ಮಾ ಫ್ವಾಂಚಾ ಹಾತಾಕಾಲ್ ಹಾಸಾ.

23 ಕ್ರಿಸ್ತ ಮಂಡಳಿಲಾ ಡುಯಿ ಹಾ ತಸಾಸ್ ಫೊ ದನ್ಗರಲಾ ಡುಯಿ ಜಾಲ್ಯಾ ಕ್ರಿಸ್ತ ಆಪ್ನುಸ್ ಮಂಡಳಿಚಾ ಶರೀರಾಲಾ ರಕ್ಷಕ್ ಜಾಲ್ಯಾ

24 ಮಂಡಳಿ ಕಸಿ ಕ್ರಿಸ್ತಾಚಾ ಹಾತಾಕಾಲ್ ಹಾ ತಸಿನ್ ಬ್ಯಾಯ್ಕಾಂಚಾನಿ ಸಗ್ಳೆ ಗುಸ್ತಿತ್ ಆಪಲ್ಯಾ ಫ್ವಾಂಚಾ ಹಾತಾಕಾಲ್ ರಾಹ್ಯಾವ್ಹಯಿ.

25 ಫ್ವಾಸಾನು, ಕ್ರಿಸ್ತಾನಿ ಮಂಡಳಿಚಿ ಕಸಿ ಮಾಯಾಕೆಲೆ ತಸಿನ್ ತುಮ್ಮೆ ಬ್ಯಾಯ್ಕಾಂಚಿ ಮಾಯಾ ಕರಾ. ಹ್ಯಚಿಸಾಟಿ ತ್ಯನಿ ಆಪಲ್ಯಾಲಾ ಬಲಿ ದಿಲ್ಯಾ

26 ಹ್ಯಚಿಸಾಟಿ ತ್ಯನಿ ಸಬೆಲಾ ದೆವಾಚಾ ವಚನಾಶಾರ್ಕ್ ಪಾನ್ಯಾನಿ ದುಹುನ್ ಶುದ್ ಕರುನ್ ಪವಿತ್ರ ಕರಯಾ ವ್ಹಯಿ ಮನ್ವುನ್ ಆಪಲ್ಯಾಲಾ ಆಪ್ನು ಬಲಿ ದಿಲ್ಯಾ

27 ಮನ್ವುನ್ ತಿಲಾ ಕಸ್ಲಾ ಡಾಗ್ ಆನಿಯಾಕ್ ನಾಹಿಚೆಗತ್ ನಿರ್ಮಳ್, ನಿರ್ದೋಷ್ ನಸ್ವಾರಿ, ಮೈಮಾ ಆಸ್ವಾರಿ ಮಂಡಳಿ ಕರುನ್ ಆಪ್ಲೆ ಮೊರ್ದು ಉಬಿ ಕರಾಯಾವ್ಹಯಿ ಮನ್ವುನ್ ವಾಕ್ಯಾ ಸಾಂಗುನ್ ಪಾನ್ಯಾನಿ ಬಾಪ್ತಿಸ್ಮಾ ದಿವುನ್ ಶುದ್ಧ್ ಕೆಲಿತ.

28 ತಸಸ್ ಫ್ವಾಂಚಾನಿ ಸಾಯಿತ್ ಆಪಲ್ಯಾ ಸ್ವತಾಚಾ ಶರೀರಾಚಿ ಮಾಯಾ ಕರತ್ಯಾತ ತಸಸ್ ಆಪ್ಲೆ ಬ್ಯಾಯ್ಕಾಂಚಿ ಮಾಯಾ ಕರ್ನಾರ

ಜಾಲ್ಯಾತ. ಆಪ್ಲೆ ದನ್ನರಿಚಿ ಮಾಯಾ ಕರ್ನಾರಾ ಆಪ್ಲಿ ಮಾಯಾ ಕರ್ನಾರಾ ಜಾಲ್ಯಾ.

29 ಕುನಿಸ್ ಕವಾಸ್ ಸ್ವತಾಚಾ ಶರೀರಾಚಾ ರಾಗ್ ಕೆಲಾನಾಹಿ ನವ್ವ ಸಗ್ಳಾಂಚಾನಿ ಆಪ್ಲ ಶರೀರ್ ಬಾಳ್ಗುನ್ ಕ್ಯಾಳ್ಜಿ ಕರ್ತ್ಯಾತ ಮಂಡಳಿ ಮಂತ್ಯಾಲ ಹ್ಯ ಶರೀರ್ ಕ್ರಿಸ್ತಾನಿ ತಸಸ್ ಬಾಳ್ಗುನ್ ಕ್ಯಾಳ್ಜಿ ಕರಿತ್ ಆಲ್ಯಾ.

30 ಮನ್ವುನ್ ಮಂಡಳಿ ಮಂತ್ಯಾಲ್ಯಾ ಶರೀರಾಲಾ ಆಮಿ ಭಾಗ್ ಜಾಲ್ಯಾವ್.

31 ಹ್ಯಾ ಕಾರ್ನಾನಿ ಘೊ ಆಪ್ಲೆ ಐ ಬಾಲಾ ಸುಡುನ್ ಆಪ್ಲೆ ಬ್ಯಾಯ್ಕೊಸಂಗ ರಾನಾರ್, ತೀ ದೊಗ ಯಾಕುಸ್ ಶರೀರ್ ಜಾಲ್ಯಾತ. ಮನ್ವುನ್ ಲಿವ್‌ಲ್ಯಾನವ್ವ.

32 ಮೀ ಕ್ರಿಸ್ತಾಲಾಬಿ ಮಂಡಳಿಲಾಬಿ ಆಸ್‌ಲ್ಯಾಲೆ ಯಕಿಚೆ ಗುಸ್ತಿತ್ ಬೊಲ್ಲೊ, ಆಝುನ್ ಪರೆತ್ ಘರುನ್ ಆಸ್‌ಲ್ಯಾಲೆ ಹೆ ಗುಟಚಾ ಆರ್ಥ್ ಮಿಬ್ ಕಿಮ್ತಿಚಾ.

33 ಫನ್ ತುಮ್ಮಿಪ ಪರತೆಕ್ ಫ್ತಾನಿ ಆಪ್ಲಿ ಮಾಯಾ ಕರ್ತ್ಯಾಚೆಗತ್ ಆಪ್ಲೆಬ್ಯಾಯ್ಕೊಚಿ ಮಾಯಾ ಕರಾಯಾವ್ತಾಯಿ. ಪರತೆಕ್ ಬ್ಯಾಯ್ಕೊನಿ ಆಪ್‌ಲ್ಯಾ ಫ್ತಾಸಂಗ ಮರೆದಿನಿ ಚಾಲಾಯಾವ್ತಾಯಿ.

6

ಐ ಬಾ ಆನಿ ಪೊರ

1 ಪೊರಾನು, ತುಮಿ ಪ್ರಭುಪ ಆಸ್‌ಲ್ಯಾಚೆಗತ್ ತುಮ್ಚೆ ಐ ಬಾಚ್ ಐಕಾ ಹ್ಯ ಚಾಂಗ್.

2 ವಾಗ್ದಾನ್ ಕೆಲ್ಯಾಲ್ಯಾಲಿ ಆಂದಿಚಿ ಆಜ್ಞೆ ಐಕಾ, ತುಜೆ ಐ ಬಾಲಾ ಮರಲ್ಯಾದ್ ದಿಯಾವ್ತಾಯಿ;

3 ಮರಲ್ಯಾದ್ ದಿಲ್ಯಾವ ತುಲಾ ಬರ ವ್ಹನಾರ್, ತು ದರ್ತಿವ ಮಿಬ್ ದಿಸ್ ಜಗ್ಗಾರ್.

4 ಬಾಸಾನು, ತುಮ್ಮಾ ಪೊರಾನಾ ರಾಗ್ ಆನಾಚೆ ಆಂದಿ, ಪ್ರಭುಲಾ ಆವ್ಹಸಾರ ತ್ಯನಾ ಶಿಸ್ತಿತ್ ಆನಿ ಶಿಕ್ಷನಾತ್ ವಾಡ್ತಾ.

ಸಾವ್ಕಾರ್ ಆನಿ ಗುಲಾಮ್

5 ಗುಲಾಮಾನು, ಕ್ರಿಸ್ತಾಚೆ ಐಕ್ತಾಸಾ ತಸಿಸ್ ದರ್ಥಿವ ತುಮಾನಾ ಸಾವ್ಕಾರ್ ಜಾಲ್ಯಾಲ್ಯಾನಾ ಮನಾತ್ ಭಿವುನ್ ಕ್ಯಾಪ್ರಿ ಬರುನ್ ಚಾಂಗಲ್ಯಾ ಮನಾನಿ ಐಕಾ.

6 ಮಾನ್ಸಾಲಾ ಬಗಾಯಾಸಾಟಿ ಮಾಲಕ್ ಬಕ್ತಾ ಆಸ್ತಾನಾ ತ್ಯವ್ಹಿಸ್ ಚಾಕ್ರಿಕರಾಚೆ ಆಂದಿ, ಕ್ರಿಸ್ತಾಚಾ ಗುಲಾಮಾ ಶಾರ್ಕ ದೇವಾಚೆ ಚಿತ್ ಮನಾ ಪಸುನ್ ಕರಾ.

7 ತುಮಿ ಕರತ್ಯಾಲಿ ಸೇವಾ ಮಾನ್ಸಾಚಿ ನವ್ವ ಪ್ರಭುಚಿ ಕರ್ತ್ಯಾವ್ ಮನ್ವುನ್ ಮನಾ ಪಸುನ್ ಕರಾ.

8 ಕಾ ಮಂಜೆ ಪರ್ತೆಕ್ ಯೊಕ್ ಮಾನುಸ್ ಗುಲಾಮ್ ವ್ಹವುನಿ ಸ್ವತಂತ್ರ ವ್ಹವುನಿ ಆಪ್ಲು ಕಸ್ಲ ದೆತೊ ತ್ಯಂಚೆ ಪ್ರತಿ ಪಳ್ ಪ್ರಭುಪ್ಣಿ ಗೆನಾರ್ ಮನ್ವುನ್ ತುಮಾನಾ ಸಮಾಜ್‌ಲ್ಯಾ ನವ್ವ.

9 ದನ್ಯಾನು, ತುಮ್ಮಾ ಗುಲಾಮಾಚೆ ಗುಸ್ತಿತ್ ತೆಸ್ ತರನಿ ಚಾಲಾ. ಸ್ವರ್ಗಾತ್ ತುಮಾನಾಬಿ ತ್ಯನಾಬಿ ದನ್ವಿಹಾ ಮನ್ವುನ್ ತ್ಯಂಚಿಪ ಪಕ್ಷಪಾತ್ ನಾಹಿ ಮನ್ವುನ್ ಸಮಾಜುನ್ ತುಮ್ಮಾ ಗುಲಾಮಾನಾ ಬ್ಯಾ ಗಾಲಾಚೆ ಸುಡುನ್ ದೇವಾ.

ದೇವಾಚಿ ಶಸ್ತ್ರ

10 ಸರ್ತ ಸಬಾತ್ ಕ್ಯಾ ಮಂಜೆ , ತುಮಿ ಪ್ರಭುಪ ತ್ಯಚೆ ಖುಬ್ ಬಳ್ ಗೆವಾ.

11 ಸೈತಾನಾಚೆ ಯವಜನಾಲಾ ಆಡ್ವ ಉಬ ರಾಹ್ಯಾ ವ್ಹಯಿಸಾರ ದೇವಾನಿ ದಿಲ್ಯಾಲಿ ಸರ್ವಿ ಶಸ್ತ್ರ ಗಾಲಾ.

12 ಆಮಚಿ ಲಡಾಯಿ ಮಾನ್ಸಾಚೆ ಸಂಗ ನವ್ವ ರಾಜಾವ್ಣಿ ಅಧಿಕಾರ್‌ಲ್ಯಾಪ್ಣಿ ಹ್ಯಾ ಅಂದಾರಾಚಾ ಲೊಕಾತ್‌ಲ್ಯಾ ಅಧಿಕಾರ್‌ಲ್ಯಾವ್, ಆಬ್ಯಾತ್‌ಲ್ಯಾ ಬುರ್ಶಾ ಸೈನ್ಯಾವ್, ಆಮಿ ಲಡ್ವಾರಿ ಜಾಲ್ಯಾವ್.

13 ಮನ್ವುನ್ ತ್ಯಾ ಬುರ್ಶಾ ದಿಸಾತ್ ವಾದಿಂಚೆ ಮೊರ್ಡ್ ಉಬರಾಹ್ಯಾ ಕರಾಯಾ ವ್ಹಯಿತ್ಯ ಸಗ್ಳೆ ಕರುನ್ ಗಟ್ ಉಬರಾಹ್ಯಾ ವ್ಹಯಿಸಾರ ದೇವಾನಿ ದಿಲ್ಯಾಲಿ ಸರ್ವಿ ಶಸ್ತ್ರ ಗಾಲುನ್‌ಗೆವಾ.

14 ಖರ ಮಂತ್ರಾಲಾ ಪಟಾ ತುಮ್ಮೆ ಕಂಬ್ರಸ್ ಬಾದುನ್, ನೀಯೆತ್ ಮಂತ್ರಾಲ ಶಾತಿಚಾ ಕವಚಾ ಗಾಲುನ್,

15 ಥಂಡ್ವನಾಚಿ ಬರಿ ಖಬರ್ ಸಾಂಗಾಯಾ ತಯಾರ್ ಜಾಲ್ಯಾಲ್ಯಾ ವ್ಹಾನ್ ಪಾಯಾತ್ ಗಾಲುನ್ ಉಬಿರಾವ್ತಾ.

16 ಸಗ್ಳಾಚೆ ಆಂದಿ ಇಸ್ವಾಸಾಚೆ ಡಾಲ ಹಾತಾತ್ ದರಾ. ತ್ಯಾನ್ ತುಮಿ ವೈರಿಚಾ ಇಸ್ತ್ಯಾಂಚೆ ಬಾನ್ ಇಜ್ವಾಯಾ ವ್ಹಯಿಲ್.

17 ಆನಿ ರಕ್ಷನಾಚಿ ಶಿರಸ್ತಾನ್ ಡುಯಿವ ಥಿವುನ್ ಪವಿತ್ರಾತ್ಮದೆತ್ಯಾಲ ದೇವಾಚಿ ವಾಕ್ಯಾ ಮಂತ್ರಾಲ ಹಾತ್ಕಾರ ಹಾತಾತ್ ದರಾ.

18 ತುಮಿ ಪವಿತ್ರಾತ್ಮಾನ್ ಬರುನ್ ಸಗ್ಳಾ ಯೆಳಾತ್ ಸಗ್ಳೆತರಚಾ ಮಾಗ್ನ್ಯಾನ್ ಕ್ರತಜ್ಞಾನ್ ದೇವಾಲಾ ಮಾಗ್ನ್ ಕರಾ. ಹ್ಯಾತ್ ಶಾಶ್ವತ್ ಮನಾನ್ ಬರುನ್ ದೇವಾಚಾ ಪೊರಾಂಚೆ ಗುಸ್ತಿತ್ ಖಾಯಿಮ್ ಮಾಗ್ನ್ ಕರಿತ್ ಜಾಗ್ರುತ್ತರಾವ್ತಾ.

19 ಆನಿ ಮಾಜಿ ಸಾಟಿ ಸಾಯಿತ್ ಮಾಗ್ನ್ ಕರಾ. ಮೀ ಬೊಲ್ತಾನಾ ಪೈಲ್ಯಾ ಕಾಲಾತ್ ಚುರುನ್ ಆಸ್ಲಾಲ್ ಬರೆ ಖಬಿಚಿ ಖರ ಬ್ಯಾ ನಸ್ತಾನಾ ಸಾಂಗಾಯಾ ಪಾಯ್ವಿತ್ಯಾ ಬೊಲ್ಯಾ ದೇವ್ ಮನಾ ದಿವುನ್ ಮನ್ವುನ್ ಮಾಗ್ನ್ ಕರಾ.

20 ತಿ ಬರಿ ಖಬರ್ ಗಿಹುನ್ ಜಾತ್ಯಾಲಾ ವಕಿಲ್ ಮೀ ತುರುಂಗಾತ್ ಹಾ ನವ್ವ್ ತ್ಯಾಚೆ ಗುಸ್ತಿತ್ ಮೀ ಬೊಲಾಯಾ ವ್ಹಯಿ ಆಸ ಧೀರಾನ್ ಬೊಲಾಯಾ ಮಾಜಿಸಾಟಿ ಮಾಗ್ನ್ ಕರಾ.

ಸರ್ತ್ಯಾ ಬೊಲ್ಯಾ

21 ಮಾಜಿ ಗುಸ್ತಿತ್ ಮಾಜಿ ಕಾಮ್ ತುಮಾನಾ ಸಮಜಿ ಸಾರ ಮಾಯೆಚಾ ಬಾಹು ಪ್ರಭುವ ಇಸ್ವಾಸಾಚಾ ಸೇವಕ್ ಜಾಲ್ಯಾಲಾ ತುಖಿಕ್ ತುಮಾನಾ ಸಗ್ಳೆ ಸಾಂಗ್ತಾರ್.

22 ತುಮಿ ಆಮ್ಚಾ ಗುಸ್ತಿ ಸಮಜುನ್ ಗಿಹಿಸಾರ, ತ್ಯೊ ತುಮ್ಮಿ ಮನ ಸಮಾಜಾವಿ ಶಾರ್ಕ್ ತ್ಯಾಲಾ ತುಮ್ಮಿಪ ಲಾವುನ್ ದಿಲ್ಯಾ.

23 ಬಾ ದೇವಾಪ್ಲಿ ಪ್ರಭು ಯೇಸು ಕ್ರಿಸ್ತಾಪ್ಲಿ ಥಂಡ್ವನ್, ಇಸ್ವಾಸಾನ್ ಬರ್ಲ್ಯಾಲಿ ಮಾಯಾ ಸಗ್ಳಾ ಇಸ್ವಾಸಿ ಬನ್ದಿ ಬಾವ್ತಾನಾ ಲಾಬುನ್.

24 ಆಮ್ನಾ ಪ್ರಭು ಯೇಸು ಕ್ರಿಸ್ತಾಲಾ ಖಾಯಿಮ್ ಮಾಯಾ
ಕರ್ನಾರ್ಯಸಗೊಳ್ಳಾಂಚಿವ ದೇವಾಚಿ ಕೃಪಾ ರಾಹುನಿ.

ದೆವಾಚಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಚಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಚಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922